

Evening Dogri News Bulletin

22 September 2024 18:15 Hrs

Headlines

- केंद्री गृह मंत्री अमित शाह होरें आखेआ ऐ जे पाकिस्तान कन्ने उच्चर कोई गल्लबात नेई कीती जाई सकदी जिच्चर आतंकवाद दा समूलचा नाश नेई होई जंदा।
- रक्षा मंत्री राजनाथ सिंह होरें पाकिस्तान दी जम्मू-कश्मीर दी अंदरूनी सियासत च दखल देने पर सख्त नुख्ताचीनी कीती ऐ।
- प्रधानमंत्री नरेंद्र मोदी होरें आखेआ ऐ जे भारत प्रशांत मुल्खें दी मदद, भ्याली ते उंदे जत्रें च सहयोग देने लेई क्वाड सदा मजूद रौहगा।
- चिन्नेई क्रिकेट टैस्ट च बंग्लादेश गी हराइयै भारत नै दुए मैचें दी श्रृंखला च 1-0 दी बढत बनाई लैती ऐ।

<><><><><><>

Amit Shah-Pak Talk

बीजेपी दे सीनियर लीडर ते केंद्री गृह मंत्री अमित शाह होरें अज्ज आखेआ ऐ जे सरकार पाकिस्तान कन्ने कोई गल्लबात नेई करोग, जिच्चर आतंकवाद दा पूरी चाल्ली खात्मा नेई होई जंदा। अज्ज नौशहरा च बीजेपी दे प्रदेश प्रधान रविंद्र रैना हुंदे हक्कै च चुनां प्रचार रैली गी संबोधित करदे होई अमित शाह होरें आखेआ जे ओहू जम्मू-कश्मीर दे नौजवानें कन्ने गल्लबात करना चाहंगन जेडे बहादुर शेर न, ना कि पाकिस्तान कन्ने जेहड़ा जम्मू-कश्मीर दे नौजवानें गी गुमराह करिए उंदे हत्थे च पत्थर ते बंदूकां फगड़ाइए उनेंगी आतंकवादी बनाना चाहंदा ऐ। अमित शाह होरें नेशनल कांफ्रेंस ते कांग्रेस पर दोष लाया जे ओहू पाकिस्तान कन्ने गल्लबात दे हिमायती न ते आतंकवादिएं ते पत्थरबाजें गी रिहा करना चाहंदे न, पर ऐसा कदें नेई होन दित्ता जाग ते कुसै बी पत्थरबाज गी रिहा नेई कीता जाग।



Rajnath

रक्षा मंत्री राजनाथ सिंह होंरें पाकिस्तान पर जम्मू-कश्मीर दी अंदरूनी सियासत च दखल देने दा आरोप लांदे होई आखेआ ऐ जे मुल्खै गी अस्थिर करने दी कुसै बी कोश्ट गी नाकाम करी दित्ता जाग। अज्ज पुंछ च इक चुनां रैली गी संबोधित करदे होई राजनाथ सिंह होंरें आखेआ जे पाकिस्तान गी कोई अधिकार नेई जे ओहू स्हाड़े अंदरूनी मामले च दखल देयै या ओदे पर बयानबाजी करै। पास्तिन दे रक्षा मंत्री ख्वाजा आसिफ हुंदे हालिया बयान जेदे च उनें नेशनल कांफ्रेंस दे घोषणा पत्तर दा समर्थन कीता हा जे सत्ता च औने पर नेशनल कांफ्रेंस ते कांग्रेस गठबंधन जम्मू-कश्मीर च दफा 370 गी परतिए बहाल करी देग, दा जिक्र करदे होई राजनाथ सिंह होंरें आखेआ जे एहू गठबंधन जम्मू-कश्मीर दे लोकें गी इस मुद्दे पर बेवकूफ बना करदा ऐ। उनें आखेआ जे एहू सियासी पार्टियां दफा 370 गी लेइए लोकें गी गुमराह करै करदियां ना।



NC-Omar

जम्मू-कश्मीर नेशनल कांफ्रेंस दे उप प्रधान ते साबका मुख्मन्त्री उमर अब्दुल्ला होंरें जम्मू-कश्मीर च त्रिशंकू विधानसभा बनने दी संभावना सवां इंकार करदे होई आखेआ जे इयां नेई होग कीजे जम्मू-कश्मीर दे लोकें इस बारी बदलाव लेई पक्का धेइया करी लैते दा ऐ। अज्ज श्रीनगर च डल झील पर इक चुनां रैली गी संबोधित करदे होई उनें दोष लाया जे पिछले 6एं बरें दौरान जदूं दा जम्मू-कश्मीर च केंद्र दा राज ऐ, जम्मू-कश्मीर दे लोकें गी किश हासल नेई होआ। उनें दावा कीता जे जम्मू-कश्मीर च अगली सरकार नेशनल कांफ्रेंस दी होग ते जम्मू-कश्मीर दे लोकें दियां सारियां तकलीफां दिक्कतां दूर होई जाडन।



Congress Kharge

कांग्रेस अध्यक्ष मल्लिकार्जुन खड्गे होंरें जम्मू-कश्मीर दे लोकें गितै तरक्कयाती विकास एजेडे दे पार्टी दे धेय्ये गी फही दोहराया ते संवैधानिक अधिकारें दी हिफाजत पर जोर पाया। 'एक्स' पर अपनी इक पोस्ट च खड्गे होंरें

लिखेआ जे भारती नेशनल कांग्रेस जम्मू-कश्मीर दे लोकें दे हक-हकूके दी राखी हिफाजत लेई प्रण पांदी ऐ। उनें लिखेआ जे स्हाढा विकास एजेंडा सबभनें लेई ऐ। उनें अगगे आखेआ जे प्रांते लेई पार्टी दियां 7 गारंटियां, समाजी न्यास ते आर्थिक सशक्तिकरण बल केंद्रित न जेदे नै उज्जवल लेई बत्त पदरी होग।

<><><><><><>

Rahul Gandhi Poonch

कांग्रेस दे सीनियर लीडर ते लोकसभा च विपक्ष दे नेता राहुल गांधी इक चुनां रैली गी संबोधित करने लेई कल पुंछ जाडन। आकाशवाणी दे पुंछ आले जिला संवाददाता अनुभव मिसरी नै कांग्रेस दे जिला प्रधान राजिंद्र सिंह हुंदे हवाले कन्ने जानकारी दिती ऐ जे राहुल गांधी होर पार्टी नेता शाहनवाज चौधरी हुंदे हक्के च प्रचार करने लेई सुरनकोट च इक चुनां रैली गी संबोधित करडन। एहदे शा पैहले राहुल गांधी होर जम्मू-कश्मीर विधानसभा चुनाएं दे सिलसिले च अनंतनाग ते रामबन जिले च बी प्रचार रैलिंग गी संबोधित करी चुके दे'न।

<><><><><><>

Phase-2nd

संघ शासित जम्मू-कश्मीर च दुए गेड दे असेंबली चुनाएं लेई चुनां प्रचार कल्ल सम्पन्न होआ रदा ऐ। दुए मरहले दे चुनाएं तैहत 26एं असेंबली नाशिस्तें लेई चुनां करोआया जाना ऐ जिंदे चा कश्मीर डिविजन दे गांदरबल, श्रीनगर ते बडगाम जिले दिआं 15 ते जम्मू डिविजन दे राजौरी, पुंछ ते रियासी जिले दियदां 11 सीटां शामिल न। जम्मू प्रांते दिएं जेड़िये असेंबली सीटे लेई 25 सितंबर गी वोट पोआए जाने न, उंदे च गुलाबगढ, रियासी, श्री माता वैष्णो देवी, कालाकोट, सुंदरबनी, नौशेहरा, राजौरी, बुद्धल, थन्नमंडी, सुरनकोट, पुंछ-हवेली ते मेंढर शामिल न।

<><><><><><>

PM-Quad

प्रधानमंत्री नरेंद्र मोदी होरे आखेआ ऐ जे क्वाड समूह लम्मी अवधि लेई भ्याल बने रौहने ते आपसी विकास लेई हिंद प्रशांत देशे कन्ने सहयोग लेई तैयार ऐ। उनें आखेआ जे क्वाड देश हिंद प्रशांत क्षेत्र गी आजाद मुक्त, समावेशी ते

खुशहाल बनाई रखने लेई बचने बदे दे'न। अमरीका दे डेलावेयर च क्वाड शिखर सम्मेलन च उनें आखेआ जे एह आयोजन नेहू समें पर होआ'रदा ऐ जिस्सलै दुनिया तनोतनी ते संघर्ष कन्नै निब्बडा'रदी ऐ ते एह जरूरी ऐ जे क्वाड देश सांझा लोकवादी मुल्लें गी ध्यानै च रखदे होई मनुक्खता लेई इकजुट होइयै कम्म करन। प्रधानमंत्री हुंदे अमरीका दे त्रऊं दिनें दे दौरे दिएं उपलब्धिएं बारै विदेश सचिव विक्रम मिस्त्री होरेंअ ज्ज मीडिया आलें गी दसदे होई एह जानकारी दित्ती। जंदी रातीं श्री मोदी होरें क्वाड मिम्बर मुल्लें दे लीडरें दे शिखर सम्मेलन च हिस्सा लैता ते इक दे मगरा इक केई दबक्खया मीटिंगा लाइयां।

<><><><><><>

Antiques

प्रधानमंत्री नरेंद्र मोदी हुंदे अमरीका दे दौरे दौरान अमरीका नै भारत थमां चोरी ते तस्करी करियै अमरीका पजाई गेदियां 297 प्राचीन चीजां उंदे सुपर्द कीत्तियां। एह पुरानियां मूर्तियां वगैरा तौले गै भारत पजाई दित्तियां जाडन। अज्ज विलमिंगटन डेलावेर च इक दबक्खया मीटिंग दे बाहरें प्रधानमंत्री मोदी ते अमरीकी राष्ट्रपति बाइडन होरें गी इंदे चा किश चीजां दस्सियां बी गेइयां ते सांकेतिक तौर पर उनेंगी श्री मोदी होरें गी सौंपी बी दित्ता गेआ। प्रधानमंत्री होरें राष्ट्रपति बाइडन होरें गी 4 ज्हार बरे थमां बी प्राचीन इनें कलाकृतिएं ते चीजे-बस्ते गी भारत गी सौंपने च उन्दे आस्सेया दित्ते गेदे सहयोग लेई धन्नवाद कीता।

<><><><><><>

DEO-Reasi

रियासी दे जिला चुनां अफसर विशेष महाजन होरें मतदाताएं गी अपील कीती ऐ जे ओह वोट पाने दे अपने अधिकार दा इस्तेमाल जरूर करन कीजे एह मौका 5एं बरें दे बाद औग। रियासी जिले च मतदान दुए गेइ तैहत 25 सितंबर गी होना ऐ जिसी पूरी चाल्ली रमानदारी आले ढंगै सिर तोइ चाढने लेई सुरक्षा सने होर सब्बै जरूरी प्रबंध करी लैते गेदे न। मतदान दे महत्व गी उजागर करदे होई विशेष महाजन होरें आखेआ जे वोट पाना शडा इक मौका गै नेई सगुआं इक मजबूत थेआर बी ऐ, आम लोकें दिएं आसें-तांगें गी पूरा करने ते उंदिएं दिक्कतें गी दूर करने दा। आकाशवाणी कन्नै गल्ल करदे होई जिला चुनां अधिकारी होरें आखेआ।

<><><><><><>

Samba-PTC

त्रऊं असेंबली हल्के आले साम्बा जिले जिल्थे जम्मू-कश्मीर विधानसभा चुनां दे त्रीए गेड तैहत पैहली अक्तूबर गी वोट पोआए जाने न, जिला प्रशासन नै मतदान पूरी चाल्ली रमानदारी ते बवस्था आले ढंगे सिर करोआने लेई लोडचदे सब्बे बंदोबस्त करी लैते देन। साम्बा दे जिला चुनां अफसर राजेश शर्मा होरें इस बारै आकाशवाणी दे जिला संवाददाता सतपाल शर्मा कन्नै गल्ल करदे होई दस्सेया।

<><><><><><>

Stanford-University

केंद्री विश्वविद्यालय जम्मू ते श्री माता वैष्णो देवी विश्वविद्यालय ककडेयाल कटडा दे 6एं-6एं शिक्षके गी Stanford University आस्सेया हाल च जारी कीती गेदी विश्व सतह दी इक फेहरिस्त च सब्बनें शा उप्परले दऊं प्रतिशत विज्ञानिकें च थाहर हासल होई ऐ। Stanford University दे जॉन पी.ए आईनिडिस ते इक मन्ने दे वैज्ञानिक प्रकाशक, आलवीर बी.वी आस्सेयां 22एं वैज्ञानिक खेत्तरें ते 174एं उप खेत्तरें लेई वैश्विक सतह दे 2 प्रतिशत सब्बनें शा उत्कृष्ट शोधकर्ताएं दी फेहरिस्त जारी कीती ऐ।

<><><><><><>

Border

जम्मू जिले दे आर.एस.पुरा सेक्टर च अंतरराष्ट्रीय बन्ने पर बीएसएफ नै घुसपैठ दी इक कोश्ट गी नाकाम बनांदे होई खरी मात्रा च थेआर-असलाहू ते गोली-बरूद बरामद कीता ऐ। आकाशवाणी दे जम्मू संवाददाता नै जानकारी दित्ती ऐ जे 21 ते 22 सितंबर दी मझाटली रातीं, पाकिस्तान कन्ने लगदे अंतरराष्ट्री बन्ने पर तैनात बीएसएफ दे जवानें किश नकलो हरकत दिक्खी। न्हेरे दा फैयदा चुक्कदे होई इक घुसपैठिया तारबंदी कश आई पुज्जे दा हा। बीएसएफ नै उसी ललकारदे होई किश रौंद गोलियां चलाइयां जेदे पर ओहू वापस नस्सी गेआ। मगरा अज्ज बडुलै इलाके च चलाए गेदे तुपाई अभियान दौरान उत्थुआं इक ए.के असाल्ट रफल, दऊं मैगजीनां, दऊं पस्तोलां, 17 रौंद गोलियां, 4 पस्तोल मैगजीनां ते पस्तोल दियां 20 गोलियां बी बरामद कीत्तियां गेइयां ना।

तोआई पुंछ जिले च बी अज्ज फौज नै मेंढर सेक्टर च नियंत्रण रेखा कश 35 बरें दे इक पाकिस्तानी घुसपैठिए गी फगड़ेआ ऐ। अज्ज बड्डलै मूंह न्हरे उसी उसलै गिरफ्तार कीता गेआ जिसले ओहू पाकिस्तान दे कब्जे आले इलाके थमां इत्त बकखी बड़ने दी कोश्ट करा'रदा हा।

<><><><><><>

Cricket

क्रिकेट च भारत नै अज्ज चेन्नई च खेड्डे गेदे पैहले टेस्ट मैच च बंगलादेश गी 280एं रन्जें कन्नै हराया ते दऊं मैचें दी श्रृंखला च 170 कन्नै बढत बनाई लैती। 515एं रन्जें दे बड्डे स्कोर दा पिच्छा करदे होई बंगलादेश दी टीम खेड् दे चौथे ध्याडे दुई पारी च 234 रन्ज बनाइयै सिमटी गेई। मेजबानी लेई रविचंद्रन अश्विन नै 6 विकटां लेइयै भारत गी शानदार जित्त दोआई। कल त्रिए ध्याडे दी खेड् मुक्कने पर बंगलादेश नै चऊं विकटें दे नुकसान पर 158 रन्ज बनाई लैते हे। खेड्डे दे त्रीए दिन भारत नै चऊं विकटें दे नुकसान पर 287 रन्ज बनाइए दुई पारी दी घोषणा करी दिती ही। शुभम गिल ते रिषभ पंत दे शतकें भारत गी इक सशक्त स्थिति पर पजाई दिता हा।

<><><><><><>